



UPM Lancar Putra LMS



Timbalan Menteri Pengajian Tinggi, Dato' Saifuddin Abdullah (kanan), Datuk Dr. Nik Mustapha (dua dari kanan) sedang mendengar penerangan mengenai fungsi Putra LMS pada pameran Seminar Kebangsaan Teknologi dan Inovasi Pengajaran-Pembelajaran 2009 (SKTIP09) dan pelancaran Putra Learning Management System (Putra LMS) baru-baru ini.

PUTRAJAYA, 28 April – Universiti Putra Malaysia (UPM) telah melancarkan Putra Learning Management System (Putra LMS) bagi membolehkan pelajar berinteraksi dengan pensyarah melalui internet untuk mendapatkan rujukan dan nota baru-baru ini.

Putra LMS dibangunkan bertujuan menyediakan platform untuk ePembelajaran dan Pusat Pembangunan Akademik (CADe) UPM bertanggungjawab untuk menyelaraskan portal tersebut.

Timbalan Menteri Pengajian Tinggi, Dato' Saifuddin Abdullah berkata Putra LMS merupakan pembelajaran secara online sebagai satu pusat sehenti interaksi secara maya antara mereka.

"Putra LMS ini akan menjadi satu sistem ePembelajaran dan pangkalan data bersepadan yang diguna oleh pensyarah dan pelajar UPM untuk meningkatkan aktiviti pembelajaran dan pengajaran secara berkesan," katanya ketika merasmikan Seminar Kebangsaan Teknologi dan Inovasi Pengajaran-Pembelajaran 2009 (SKTIP09) dan pelancaran Putra Learning Management System (Putra LMS) di sini.

Sebelum ini UPM mempunyai lima LMS yang diuruskan sendiri oleh Fakulti Kejuruteraan, Fakulti Pengajian Pendidikan, Fakulti Ekonomi dan Pengurusan dan Fakulti Bahasa Moden dan Komunikasi.

LMS tunggal UPM dikenali sebagai Putra LMS mampu menampung sehingga 20,000 pengguna dalam satu masa melebihi keperluan semasa UPM.

Ia dijangka dapat digunakan sepenuhnya menjelang semester 1 2009/10 dan beroperasi sebagai LMS tunggal universiti mulai semester II 2009/10.

Sementara itu, Naib Canselor UPM, Prof. Datuk Dr. Nik Mustapha R. Abdullah berkata pengajuran seminar itu merupakan satu permulaan yang baik dalam meningkatkan penggunaan teknologi dan inovasi dalam pengajaran dan pembelajaran.

"Penggunaan teknologi maklumat dan komunikasi dapat menyebar maklumat dalam masa singkat melalui ePembelajaran selain meningkatkan kualiti pelajar," katanya.



Timbalan Menteri Pengajian Tinggi, Datuk Saifuddin Abdullah (enam dari kanan), Datuk Dr. Nik Mustapha (tujuh dari kanan) bergambar bersama-sama pensyarah UPM selepas merasmikan seminar tersebut.

Disediakan oleh Seksyen Media dan Publisiti Bahagian Komunikasi Korporat UPM.